

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 17 OKTOBER 2023, PUKUL 10.00 PAGI

Bil. 3

WAKTU PERTANYAAN-PERTANYAAN MENTERI

1. PR-1523-MQT2393
Datuk Seri Dr. Noraini Ahmad [Parit Sulong] minta **PERDANA MENTERI** menyatakan rancangan terkini berkenaan pendekatan de-dolarisasi (*de-dollarisation*) bagi menggalakkan perdagangan antara negara lain menggunakan mata wang Ringgit Malaysia dan sejauh manakah inisiatif ini disambut oleh negara-negara serantau.
2. PR-1523-MQT2380
Dato' Rosol bin Wahid [Hulu Terengganu] minta **PERDANA MENTERI** menyatakan apakah jaminan Kerajaan bahawa langkah mengapungkan harga ayam dan telur tidak akan membebankan rakyat yang sedang berhadapan dengan kos sara hidup yang tinggi.

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 17 OKTOBER 2023, PUKUL 10.00 PAGI

Bil. 55

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1523-L21593
Tuan Roy Angau anak Gingkoi [Lubok Antu] minta **MENTERI PERLADANGAN DAN KOMODITI** menyatakan usaha dalam mempromosi dan menyebarkan maklumat berkenaan skim dan bantuan yang disediakan di bawah Kementerian terutamanya di kawasan luar bandar dan pedalaman Sarawak di mana penduduk bergantung sepenuhnya kepada aktiviti penanaman komoditi seperti sawit, getah dan lada sebagai sumber pendapatan.
2. PR-1523-L21676
Datuk Wira Hajah Mas Ermieyati binti Samsudin [Masjid Tanah] minta **MENTERI DALAM NEGERI** menyatakan langkah yang diambil oleh pihak Kementerian bagi mengatasi isu kesesakan banduan di dalam penjara dan apakah program-program ataupun latihan-latihan yang dikenal pasti untuk membantu bekas banduan untuk meneruskan kehidupan mereka supaya tidak terjejak kembali dalam dunia jenayah.
3. PR-1523-L21383
Datuk Seri Ir. Dr. Wee Ka Siong [Ayer Hitam] minta **MENTERI KEWANGAN** menyatakan maklum balas dan input terkini dari pihak berkepentingan dalam usaha pemindaan Akta Akauntan 1967 dan sejauh manakah pindaan akta ini akan memberikan kesan terhadap kelayakan graduan universiti tempatan untuk menjadi akauntan di negara ini.

4. PR-1523-L22093
Tuan Roslan bin Hashim [Kulim Bandar Baharu] minta **MENTERI PENDIDIKAN** menyatakan mengapa 5 hadis digugurkan daripada hadis 40.
5. PR-1523-L21166
Tuan Prabakaran A/L M Parameswaran [Batu] minta **MENTERI PEMBANGUNAN WANITA, KELUARGA DAN MASYARAKAT** menyatakan selain daripada bantuan kewangan daripada Jabatan Kebajikan Masyarakat, apakah jenis bantuan yang disediakan oleh pihak JKM untuk membantu kanak-kanak yang berhadapan masalah Autisme dan ADHD .
6. PR-1523-L22178
Tuan Wan Razali bin Wan Nor [Kuantan] minta **MENTERI PENGANGKUTAN** menyatakan status terkini perkembangan projek Laluan Rel Pantai Timur (ECRL) :
 - (a) bilangan syarikat tempatan dan syarikat luar yang terlibat dalam projek ECRL; dan
 - (b) adakah terdapat implikasi kewangan tambahan yang terkini bagi projek ini.
7. PR-1523-L21448
Tuan Kesavan A/L Subramaniam [Sungai Siput] minta **MENTERI PEMBANGUNAN USAHAWAN DAN KOPERASI** menyatakan berapa jumlah yang telah dibelanjakan setakat ini daripada RM200 juta yang diperuntukkan kepada TEKUN dan RM30 juta yang diperuntukkan kepada SPUMI dalam belajawan 2023.
8. PR-1523-L22286
Dato' Sri Tuan Ibrahim bin Tuan Man [Kubang Kerian] minta **MENTERI PERPADUAN NEGARA** menyatakan adakah kerajaan bercadang untuk membina sebuah pusat konservasi artifak (*Conservation Centre*) yang berfungsi seperti di *Heritage Conservation Centre (HCC)*, Singapura bagi menjaga warisan ketara negara dan artifak.
9. PR-1523-L21241
Dr. Kelvin Yii Lee Wuen [Bandar Kuching] minta **MENTERI KESIHATAN** menyatakan perancangan Kementerian untuk membeli vaksin HPV, jenis vaksin yang dibeli dan jangka masa untuk memastikan mereka yang tercicir terutamanya pada zaman COVID-19 mendapat vaksin yang diperlukan.

10. PR-1523-L21667
Tuan Haji Muhammad Islahuddin bin Abas [Mersing] minta **MENTERI DALAM NEGERI** menyatakan pendekatan yang dilaksanakan oleh Jabatan Imigresen Malaysia (JIM) dalam menambah baik mutu perkhidmatan dan operasi pusat pemeriksaan sempadan di Kompleks Kastam, Imigresen dan Kuarantin (CIQ) Bangunan Sultan Iskandar, Johor.
11. PR-1523-L21846
Tuan Manndzri bin Nasib [Tenggara] minta **MENTERI PENDIDIKAN** menyatakan adakah terdapat sebarang perancangan daripada pihak Kementerian bagi membaik pulih fasiliti bukan akademik yang terdapat di sekolah-sekolah seperti peralatan sukan, padang serta gelanggang sukan dan sebagainya demi pembangunan siasah dan kendiri pelajar.
12. PR-1523-L21700
Kapten Azahari bin Hasan [Padang Rengas] minta **MENTERI PENGANGKUTAN** menyatakan semakan semula fasiliti kemudahan awam yang disediakan di setiap stesen KTM (Keretapi Tanah Melayu) khususnya di KTM Padang Rengas kerana ada sesetengah daripadanya tidak mesra pengguna/OKU. Seperti contoh tiada lif untuk pengguna OKU berkerusi roda. Mohon dinaik taraf.
13. PR-1523-L21223
Tuan Fong Kui Lun [Bukit Bintang] minta **MENTERI KEWANGAN** menyatakan cukai dan hasil yang gagal dikutip oleh LHDN dan Kastam sepanjang tahun lalu dan terkini dari pelbagai entiti dan usaha untuk meningkatkan kutipan.
14. PR-1523-L22299
Tuan Muhammad Fawwaz bin Mohamad Jan [Permatang Pauh] minta **MENTERI KESIHATAN** menyatakan inisiatif Kementerian bagi mengurangkan kadar penyakit tidak berjangkit seperti diabetes dan hipertensi dalam kalangan belia menerusi program sukan dan kecergasan dengan kerjasama Kementerian Belia dan Sukan.
15. PR-1523-L21484
Tuan Sim Tze Tzin [Bayan Baru] minta **MENTERI PENGANGKUTAN** menyatakan sama ada MRT Corp akan mengguna pakai jajaran LRT Bayan Lepas - Georgetown yang sedia ada untuk mempercepatkan perlaksanaan projek. Adakah Kerajaan pusat akan membiayai keseluruhan projek tersebut.

16. PR-1523-L22338

Tuan Jamaludin bin Yahya [Pasir Salak] minta **MENTERI PENDIDIKAN** menyatakan mengapa sehingga kini masih ada sekolah yang masih belum menerima pengganti setelah guru bergerak keluar daripada sekolah tersebut hingga menyebabkan kekurangan guru dan ada pengganti guru yang masuk tidak mengikut opsyen mengajar yang sepatutnya diganti.

17. PR-1523-L21288

Dato' Sri Doris Sophia anak Brodi [Sri Aman] minta **MENTERI KESIHATAN** menyatakan bilangan doktor psikiatri dan psikologi serta pakar tetap dan kontrak dalam kedua-dua bidang ini dan apakah usaha terkini pihak Kementerian untuk memastikan bilangan doktor dalam bidang ini mencukupi untuk merawat kes kesihatan mental yang kian meningkat di negara kita.

18. PR-1523-L22438

Dr. Abd Ghani bin Ahmad [Jerlun] minta **MENTERI DALAM NEGERI** menyatakan apakah langkah-langkah drastik untuk mengurus penggajian warga asing di Malaysia melalui Pas Lawatan Kerja Sementara (PLKS) yang tamat tempoh dihantar pulang ke negara asal kerana jika diabaikan ia boleh mencetus masalah sosial kepada masyarakat dan mengancam keselamatan rakyat tempatan.

19. PR-1523-L21427

Tuan Lim Guan Eng [Bagan] minta **MENTERI PENGANGKUTAN** menyatakan penyelesaian ke atas masalah katering dan makanan panas dalam penerbangan MAS serta perbandingan kos dan mutu makanan sekarang berbanding dengan kontraktor lama Brahim Food Services serta impak ini kepada hasil dan keuntungan MAS.

20. PR-1523-L22564

Dato' Ahmad bin Saad @ Yahaya [Pokok Sena] minta **MENTERI KESIHATAN** menyatakan :

- (a) faktor yang mendorong Rang Undang-undang Kawalan Tembakau dan Rokok tidak dibentangkan pada sesi Parlimen yang lalu; dan
- (b) pendirian Kementerian berhubung dasar Generasi Penamat (GEG) rokok.

21. PR-1523-L21517
Tuan Haji Ahmad Johnie bin Zawawi [Igan] minta **MENTERI PENDIDIKAN** menyatakan status terkini pembinaan baharu Sekolah Menengah Matu, SK Bawang Tian Matu, SK Kampung Pergau Matu dan SK kampung Tebaang Daro. Bilakah pembinaan sekolah ini akan mula dilaksanakan.
22. PR-1523-L22230
Datuk Seri Takiyuddin bin Hassan [Kota Bharu] minta **MENTERI DALAM NEGERI** menyatakan status terkini penguatkuasaan undang-undang berkenaan larangan penggunaan kalimah Allah dalam kalangan orang bukan Islam susulan tindakan penarikan balik rayuan oleh pihak KDN dan Kerajaan terhadap keputusan Mahkamah Tinggi pada Mac 2021.
23. PR-1523-L21581
Datuk Seri Panglima Madius Tangau [Tuaran] minta **MENTERI KESIHATAN** menyatakan adakah Kementerian bercadang untuk membina Klinik Jenis 2 ataupun Poliklinik di kawasan Parlimen Tuaran dalam masa terdekat.
24. PR-1523-L22261
Dr. Siti Mastura binti Muhammad [Kepala Batas] minta **MENTERI PENDIDIKAN** menyatakan perincian perancangan pembinaan sekolah-sekolah baharu di bawah KPM dalam Parlimen Kepala Batas dan Pulau Pinang.
25. PR-1523-L21538
Dato' Seri Haji Aminuddin bin Harun [Port Dickson] minta **MENTERI PENDIDIKAN** menyatakan apakah status terkini mengenai masalah kekurangan hampir 20 000 guru dan apakah perancangan Kementerian untuk mengatasi masalah ini.
26. PR-1523-L22020
Tuan Mohd Azizi bin Abu Naim [Gua Musang] minta **MENTERI PENDIDIKAN** menyatakan mengapa Unit Perolehan KPM tidak segera membayar Pelarasan Harga Kontrak tanpa syarat kepada kontraktor yang melaksanakan Kontrak Kebersihan Bangunan dan Kawasan yang mendapat kontrak sebelum perintah perlaksanaan gaji minima RM1,500.00 pada Mei 2022.

27. PR-1523-L21373

Dato' Sri Sh Mohmed Puzi bin Sh Ali [Pekan] minta **MENTERI PEMBANGUNAN WANITA, KELUARGA DAN MASYARAKAT** menyatakan tindakan agresif Kementerian dalam menangani peningkatan kes penderaan dan pengabaian di taska kanak-kanak yang berdaftar dengan JKM memandangkan TASKA berkenaan boleh kembali beroperasi selepas penutupan sementara.

28. PR-1523-L21617

Dr. Mohammed Taufiq bin Johari [Sungai Petani] minta **MENTERI KESIHATAN** menyatakan sama ada Kementerian akan mengkaji semula jumlah maksimum pesakit per wad / per kubikel berdasarkan keluasan wad dan jumlah pekerja kesihatan bagi mengurangkan masalah kepadatan hospital.

29. PR-1523-L21847

Tuan Khoo Poay Tiong [Kota Melaka] minta **MENTERI DALAM NEGERI** menyatakan perkembangan terkini siasatan mengenai kes imigresen di KLIA yang berlaku pada 29 Jun 2023 baru-baru ini.

30. PR-1523-L21249

Dato Anyi Ngau [Baram] minta **MENTERI DALAM NEGERI** menyatakan perancangan berkenaan pembaikan balai polis dan kuarters kediaman anggota polis di Pekan Long Lama, Pekan Beluru dan Bario. Mohon jelaskan samada pihak Kementerian akan menempatkan anggota polis di Pekan Lapok dan Long Bedian Baram yang telah dinaik taraf sebagai daerah kecil oleh Kerajaan Sarawak.

31. PR-1523-L22363

Tuan Chong Zhemini [Kampar] minta **MENTERI PENDIDIKAN** menyatakan tatacara pengendalian piawai dan sebab kelulusan mengambil masa panjang bagi projek pembangunan seperti pembinaan bangunan baharu, gelanggang berbumbung, dewan sekolah melibatkan Sekolah Bantuan Kerajaan (SBK) walaupun tanah telah disediakan dan kos pembinaan ditanggung oleh LPS.

32. PR-1523-L22401

Tuan Wong Chen [Subang] minta **MENTERI PENGANGKUTAN** menyatakan respon Kerajaan terhadap dakwaan bahawa pelabuhan-pelabuhan Malaysia digunakan untuk memudahkan saluran bahan api jet kepada pesawat pengebom junta Myanmar.

33. PR-1523-L22619

Datuk Wan Saifulruddin bin Wan Jan [Tasek Gelugor] minta **MENTERI DALAM NEGERI** menyatakan kronologi yang membawa kepada kelulusan penganjuran Himpunan MADANI Kedah 2023 anjuran Sekretariat Pakatan Harapan Nasional dan Pakatan Harapan Negeri Kedah pada 24 April 2023, terutamanya apakah dokumen yang dihantar oleh pihak penganjur kepada PDRM, bilakah dokumen-dokumen tersebut diterima dan apakah tarikh permit PDRM dikeluarkan.

34. PR-1523-L21627

Puan Rodiyah binti Sapiee [Batang Sadong] minta **MENTERI PERLADANGAN DAN KOMODITI** menyatakan langkah dan inisiatif tambahan atau galakan kepada penanam koko dalam mengatasi isu penanaman seperti kos input pertanian yang tinggi mengakibatkan pembajaan yang terhad serta kekurangan golongan belia yang berminat untuk meneruskan usaha penanaman koko seperti disuarakan oleh pekebun kecil.

35. PR-1523-L22621

Datuk Wan Saifulruddin bin Wan Jan [Tasek Gelugor] minta **MENTERI PENDIDIKAN** menyatakan langkah yang telah diambil untuk memastikan kontraktor kebersihan, makanan bermasakan dan keselamatan dibayar setiap bulan mengikut tempoh masa dalam kontrak agar mereka tidak perlu berhutang dengan syarikat pemfaktoran dan semua tunggakan terutama untuk pelarasan gaji minima dilunaskan segera.

36. PR-1523-L21722

Datuk Ali anak Biju [Saratok] minta **MENTERI PENDIDIKAN** menyatakan sudahkah proses pengambilan tanah untuk bina baru SK Ulu Kabo dapat dimuktamadkan. Adakah Kerajaan bercadang untuk memulakan pembinaan SK Ulu Kabo di dalam RMK-12.

37. PR-1523-L21257

Dr. Richard Rapu @ Aman anak Begri [Betong] minta **MENTERI PENDIDIKAN** menyatakan berapa jumlah peruntukan tahunan yang diagihkan untuk penyelenggaraan sekolah serta penambahbaikan kemudahan dan perabot sekolah yang telah uzur, rosak dan tidak berfungsi di Sarawak bagi tahun 2018 hingga 2022.

38. PR-1523-L21131

Dato' Mohd Isam bin Mohd Isa [Tampin] minta **MENTERI PEMBANGUNAN USAHAWAN DAN KOPERASI** menyatakan inisiatif yang diambil untuk membantu para peniaga kecil dalam sektor makanan agar terus berdaya saing di saat berdepan dengan cabaran kenaikan harga bahan mentah dan kekurangan pekerja kebelakangan ini.

39. PR-1523-L22236

Datuk Che Mohamad Zulkifly bin Jusoh [Besut] minta **MENTERI DALAM NEGERI** menyatakan persediaan yang telah dilakukan oleh pihak Kerajaan dalam menyelesaikan polemik penggunaan Kalimah Allah susulan penarikan balik rayuan terhadap keputusan Mahkamah Tinggi dalam kes Jill Ireland melawan Menteri bagi Kementerian Dalam Negeri dan siapakah pihak-pihak yang terlibat dan dirundingi dalam menetapkan dasar dan polisi baru yang akan diangkat kepada Majlis Raja-Raja pada bulan Oktober ini.

40. PR-1523-L21556

Tuan Mohd Sany bin Hamzan [Hulu Langat] minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kementerian akan memperkenalkan geran atau insentif bagi pembinaan lebih banyak pusat jagaan swasta atau rumah jagaan warga emas yang terdapat dalam negara ini bagi menghadapi situasi "Negara Menua".

41. PR-1523-L22453

Tuan Afnan Hamimi bin Taib Azamuddin [Alor Setar] minta **MENTERI KEWANGAN** menyatakan sejak bilakah pihak bank mengenakan pelbagai tapisan terhadap pemohon pinjaman yang disenaraikan sebagai *Political Exposed Person* (PEP) dan apakah kewajaran dikenakan pelbagai tapisan tersebut.

42. PR-1523-L21927

Dato' Ramanan Ramakrishnan [Sungai Buloh] minta **MENTERI PENDIDIKAN** menyatakan apakah langkah-langkah bagi memastikan kes pembulian di sekolah dapat dicegah dan proses pemulihan kepada pembuli dan mangsa yang dibuli.

43. PR-1523-L21744

Dato' Haji Abdul Khalib bin Abdullah [Rompin] minta **MENTERI PENDIDIKAN** menyatakan adakah Kementerian mempunyai rancangan jangka panjang untuk membuat penjajaran semula hala tuju pendidikan negara bagi memaknakan Falsafah Pendidikan Negara yang dilihat semakin dilupakan akibat pembelajaran beroreintasikan peperiksaan masih menebal dalam masyarakat.

44. PR-1523-L21721
Datuk Ali anak Biju [Saratok] minta **MENTERI PENDIDIKAN** menyatakan status pembinaan baru SK Babang di Saratok. Sudahkah proses tender dibuat dan bilakah kerja-kerja fizikal dapat dimulakan di tapak.
45. PR-1523-L21283
Tuan Oscar Ling Chai Yew [Sibü] minta **MENTERI KEWANGAN** menyatakan sama ada cadangan penubuhan Asian Monetary Fund ditimbulkan di ASEAN Summit dan Belt and Road Summit yang akan dilangsungkan pada Oktober 2023.
46. PR-1523-L22331
Dr. Ahmad Fakhruddin bin Fakhrurazi [Kuala Kedah] minta **MENTERI PENDIDIKAN** menyatakan perancangan untuk mengadakan perbincangan berkenaan kerelevanan mengurangkan ataupun menoktahkan sekolah-sekolah dua sesi.
47. PR-1523-L21231
Tuan Sanisvara Nethaji Rayer A/L Rajaji [Jelutong] minta **MENTERI DALAM NEGERI** menyatakan menjelaskan bila kerja-kerja pembinaan berek polis baru di hadapan Balai Polis Jelutong, Pulau Pinang dijangka akan bermula.
48. PR-1523-L22011
Tuan Haji Kamal bin Ashaari [Kuala Krau] minta **MENTERI DALAM NEGERI** menyatakan berapa jumlah terkini warga asing terutamanya dari China yang masuk ke negara tanpa rekod keluar walaupun telah tamat tempoh visa.
49. PR-1523-L21749
Datuk Seri Panglima Haji Mohd Shafie bin Haji Apdal [Semporna] minta **MENTERI DALAM NEGERI** menyatakan setelah 10 tahun kejadian pencerobohan Lahad Datu dan penubuhan Pihak Berkuasa Kawasan Keselamatan Khas Pantai Timur Sabah (ESSCOM), apakah cabaran yang perlu diatasi serta aset-aset yang diperlukan bagi menamatkan perintah berkurung di kawasan Zon Keselamatan Pantai Timur Sabah (ESSZONE).
50. PR-1523-L22129
Puan Hajah Salamiah binti Mohd Nor [Temerloh] minta **MENTERI DALAM NEGERI** menyatakan :
(a) mengapakah diletakkan kuota 10 ribu jumlah pemohonan kewarganegaraan mesti diselesaikan hujung tahun ini; dan

- (b) berapa jumlah kelulusan kewarganegaraan setakat bulan Januari 2023 sehingga Ogos 2023 dan berapa jumlah permohonan yang masih menunggu untuk diluluskan.

51. PR-1523-L21616

Dr. Mohammed Taufiq bin Johari [Sungai Petani] minta **MENTERI KESIHATAN** menyatakan rancangan peringkat Kementerian bagi memperkasa servis serta pusat kesihatan (*primary care*) untuk menyelesaikan masalah lambakan pesakit *non-emergency* di bahagian kecemasan sekaligus mengurangkan kepadatan hospital.

52. PR-1523-L21216

Tuan Fong Kui Lun [Bukit Bintang] minta **MENTERI PERPADUAN NEGARA** menyatakan sejauh mana Rukun Negara yang menjadi intipati Kerajaan Perpaduan berjaya dilaksana dan diterapkan dalam masyarakat pelbagai kaum di negara ini supaya menjadi teras Malaysia Madani.

53. PR-1523-L21840

Puan Rodziah binti Ismail [Ampang] minta **MENTERI DALAM NEGERI** menyatakan status terkini dan dasar KDN memastikan bahawa sebarang pengusiran mangsa pelarian dan/atau pemohon suaka ke negara asal tidak bercanggah dengan prinsip *non-refoulement* memandangkan UNHCR dilarang akses kepada depot/pusat tahanan imigresen sejak Ogos 2019.

54. PR-1523-L21199

Datuk Wetrom bin Bahanda [Kota Marudu] minta **MENTERI PEMBANGUNAN USAHAWAN DAN KOPERASI** menyatakan apakah pihak Kementerian mempunyai perancangan meningkatkan program-program usahawan di kawasan Kota Marudu terutama kepada lepasan sekolah yang tidak melanjutkan pelajaran ke peringkat lebih tinggi dan juga adakah terdapat proram-program khusus memperkenalkan insentif daripada Kementerian bagi membantu usahawan-usahawan muda ini.

55. PR-1523-L21793

Tuan Cha Kee Chin [Rasah] minta **MENTERI PENDIDIKAN** menyatakan data pengambilan Program Ijazah Sarjana Muda Perguruan (PISMP) bagi aliran Sekolah Kebangsaan (SK), SJKC, SJKT dan Sekolah Mubaligh dari tahun 2018 ke tahun 2023. Bagaimanakah formula pengambilan PISMP dilaksanakan pada masa kini dan apakah langkah baru yang bakal diambil memandangkan isu kekurangan guru masih berterusan sehingga kini.

56. PR-1523-L21518

Tuan Haji Ahmad Johnie bin Zawawi [Igan] minta **MENTERI KESIHATAN** menyatakan bilakah Klinik Kesihatan Daro dan Klinik Pergigian Daro yang terbengkalai akan dilaksanakan pembinaannya.

57. PR-1523-L21860

Tuan Manndzri bin Nasib [Tenggara] minta **MENTERI KESIHATAN** menyatakan adakah pihak Kementerian bercadang untuk mengembalikan semula Bayaran Insentif Pentadbir Hospital (BIPH) kepada Pegawai Perubatan yang memperoleh Ijazah Sarjana Pengurusan Hospital dari Universiti Tempatan seperti UKM, UTM, UM dan banyak lagi kerana terdapat makluman yang menyatakan bahawa pemegang Ijazah Sarjana Pengurusan Hospital dari London, Filipina dan Australia masih lagi menerima elaun tersebut.

ATURAN URUSAN MESYUARAT DAN USUL-USUL

1. (D.R. 31/2023) Rang Undang-undang Perbekalan 2024 - **Menyambung semula perbahasan atas masalah, "Bahawa Rang Undang-Undang ini dibacakan kali yang kedua sekarang," (16 Oktober 2023)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari sembilan puluh dua bilion ringgit (RM92,000,000,000) dibelanjakan daripada Kumpulan Wang Pembangunan bagi tahun 2024, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2024, yang dibentangkan sebagai Kertas Perintah 34 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Menyambung semula perbahasan atas masalah (16 Oktober 2023)

2. (D.R. 33/2023) Rang Undang-Undang Syarikat (Pindaan) 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang," (12 Oktober 2023)**

[Menteri Perdagangan Dalam Negeri dan Kos Sara Hidup]

3. (D.R. 25/2023) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

4. (D.R. 26/2023) Rang Undang-Undang Makanan (Pindaan) 2023. **Bacaan Kali Yang Kedua**
[Menteri Kesihatan]

5. PR-1523-U(27)278
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

[Menteri Pertanian dan Keterjaminan Makanan]

6. PR-1523-U(27)279
Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

[Menteri Dalam Negeri]

7. PR-1523-U(27)280

Datuk Seri Ir. Dr. Wee Ka Siong [Ayer Hitam] akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

[Menteri Pertanian dan Keterjaminan Makanan]

8. PR-1523-U(27)281

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

[Menteri Pembangunan Wanita, Keluarga dan Masyarakat]

9. PR-1523-U(27)283

Dato' Indera Mohd Shahar bin Abdullah [Paya Besar] akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

[Menteri Dalam Negeri]

10. PR-1523-U(27)286

Datuk Seri Panglima Madius Tangau [Tuaran] akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

[Menteri Pendidikan]

11. PR-1523-U(27)287

Datuk Seri Panglima Madius Tangau [Tuaran] akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

[Menteri Dalam Negeri]

12. PR-1523-U(27)290

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

[Menteri Pendidikan]

13. PR-1523-U(27)291

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

[Menteri Dalam Negeri]

14. PR-1523-U(27)292

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat."

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

[Perdana Menteri]

15. PR-1523-U(27)293

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

[Menteri Pertanian dan Keterjaminan Makanan]

16. PR-1523-U(27)294

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

[Menteri Pertanian dan Keterjaminan Makanan]

17. PR-1523-U(27)295

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

[Menteri Pertanian dan Keterjaminan Makanan]

18. PR-1523-U(27)296

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

[Perdana Menteri]

19. PR-1523-U(27)297

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

[Menteri Ekonomi]

20. PR-1523-U(27)298

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan

Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

[Perdana Menteri]

21. PR-1523-U(27)299

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

[Menteri Sumber Asli, Alam Sekitar dan Perubahan Iklim]

22. PR-1523-U(27)300

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiaga siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

[Perdana Menteri]

23. PR-1523-U(27)301

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjung Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

[Menteri Dalam Negeri]

24. PR-1523-U(27)302

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

[Menteri Kewangan]

25. PR-1523-U(27)303

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

[Menteri Komunikasi dan Digital]

26. PR-1523-U(27)304

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

[Menteri Pendidikan]

27. PR-1523-U(27)305

Dato' Seri Dr. Shahidan bin Kasim [Arau] akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

[Menteri Dalam Negeri]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2023</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
CMD. 51	Laporan Tahunan Suruhanjaya Perkhidmatan Awam Malaysia (SPA) Bagi Tahun 2022	17 Oktober 2023
ST. 192	Laporan Tahunan dan Penyata Kewangan Lembaga Pemasaran Pertanian Persekutuan (FAMA) Bagi Tahun 2021	17 Oktober 2023
ST. 196	AKTA IMIGRESEN 1959/63 Peraturan-Peraturan Imigresen (Pindaan) 2022 P.U. (A) 56/2022 diwartakan 15 Mac 2022	17 Oktober 2023

****UCAPAN-UCAPAN**
(PERATURAN MESYUARAT 17)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 17.10.2023 (Selasa)	1. YB Datuk Andi Muhammad Suryady bin Bandy (Kalabakan)	1. Status Pembinaan Jalan Tanjung Batu Logpond ke Kampung Pasir Putih	1. YB Menteri Kerja Raya
2. 17.10.2023 (Selasa)	2. YB Datuk Andi Muhammad Suryady bin Bandy (Kalabakan)	2. Status Pembinaan Projek Perumahan Rakyat (PPR) di Tapak Lapangan Terbang Lama Tawau	2. YB Menteri Pembangunan Kerajaan Tempatan
3. 17.10.2023 (Selasa)	3. YB Tuan Haji Muhammad Islahuddin bin Abas (Mersing)	3. Isu Pendidikan di Parlimen Mersing	3. YB Menteri Pendidikan
4. 17.10.2023 (Selasa)	4. YB Tuan Haji Muhammad Islahuddin bin Abas (Mersing)	4. Masalah Pengusaha Bot Berlesen JMS Mersing	4. YB Menteri Pengangkutan

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**